

U ovom broju, između ostalog, čitajte:

- **Predsjednik i direktor predstavili inicijative UPFBiH za poboljšanje poslovnog ambijenta delegaciji MMF**
- **UPFBiH pozvalo zastupnike Zastupničkog doma Parlamenta BiH da ukinu akcize na naftne derivate**
- **Na inicijativu UPFBiH, ZD PFBiH odobrio nastavak rada termoblokova 4 i 5 u Tuzli i Kaknju**
- **Predstavnici UPFBiH i UUPRS sa šefom Delegacije EU u BiH**
- **UPFBiH uputilo DN PSBiH amandman na Prijedlog zakona o dopunama zakona o porezu na dodanu vrijednost**
- **Predstavnici UPFBiH sa ministricom Đapo o problemima nedostatka kadrova u turističko - ugostiteljskom sektoru**
- **UPFBiH i Ministarstvo vanjske trgovine o problemima koje će izazvati primjena Zakona o carinskoj politici**



Predsjednik i direktor predstavili inicijative UPFBiH za poboljšanje poslovnog ambijenta delegaciji MMF

Na sastanku su predstavnici UPFBiH dali ocjenu o ekonomskoj situaciji i efektima pandemije COVID-19 na privredu

Adnan Smailbegović i Mladen Pandurević, predsjednik i direktor Udruženja poslodavaca Federacije Bosne i Hercegovine razgovarali su sa šeficom Misije Međunarodnog monetarnog fonda za BiH Alinom Iancu i rezidentnim predstavnikom MMF-a u BiH Andrew Jewelom i njihovim saradnicima o ekonomskim trendovima u Federaciji BiH te mogućnostima unapređenja ekonomije.



Na sastanku su predstavnici Udruženja poslodavaca FBiH dali ocjenu o ekonomskoj situaciji i efektima pandemije Covida-19 na privredu, uticaju i efektima mjera za pomoć privredi u kontekstu pandemije, sektorima pogođenim pandemijom.

Također su dali svoje ocjene oporavka privrede, koliko je oporavak snažan i šta su njegovi glavni pokretači, uticaju pandemije na tržište rada i mogućnostima za njegov oporavak.

Prenijeli su ocjene i stavove Udruženja polodavaca FBiH o prekidima u lancima snabdijevanja, kao i procjene trendova u pogledu inflacije, cijena energenata i hrane, kao i uticaja viših cijena električne energije na proizvodnju. Na kraju su date ocjene poslovnog okruženja, glavnih izazova u tom segmentu i mogućnosti poboljšanja te procesa digitalizacije i zelene ekonomije.



Predstavnici Udruženja poslodavaca FBiH informirali su članove delegacije MMF-a o aktivnostima Udruženja na poboljšanju poslovnog ambijenta u FBiH, a koje imaju za cilj smanjenje opterećenja na privredu, očuvanje radnih mjesta, jačanje privrede i poboljšanje socijalnog položaja radnika.



Tokom razgovora predstavnicima Međunarodnog monetarnog fonda su predstavljene inicijative i prijedlozi Udruženja poslodavaca FBiH koji su u

protekлом periodu upućeni Vijeću ministara BiH i Vladi Federacije BiH, sa pratećim analizama u kojima su jasno istaknuti benefiti inicijativa i prijedloga, kako za uposlenike i poslodavce tako i za budžete.

UPFBiH poziva zastupnike Zastupničkog doma Parlamenta BiH da ukinu akcize na naftne derivate

UPFBiH upozorava da je zbog poremećaja u snabdijevanju naftom na svjetskom tržištu došlo do značajnog povećanja cijena naftnih derivat

Udruženje poslodavaca FBiH poziva zastupnike Zastupničkog doma Parlamenta Bosne i Hercegovine da usvoje prijedlog Kluba poslanika SDP BiH i donesu Prijedlog zakona o izmjenama Zakona o akcizama u Bosni i Hercegovini, kojima se predviđa ukidanje akciza na naftne derivate.



UPFBiH upozorava da je zbog poremećaja u snabdijevanju naftom na svjetskom tržištu došlo do značajnog povećanja cijena naftnih derivata i da će se takav trend prema svim pokazateljima nastaviti i u narednom periodu.

Stalni rast cijena cijena nafte i naftnih derivata već dovodi do rasta cijena svih drugih proizvoda i usluga, što u značajnoj mjeri opterećuje životni standard građana.

Ukidanje akciza na naftu i naftne derivate u BiH dovelo bi do smanjenja cijena goriva, čime bi se u značajnoj mjeri pomoglo građanima, ali i privredi da prebrode postojeću krizu. UPFBiH se zalaže da svaka zloupotreba ukidanja akciza na naftne derivate od strane privrednih društava bude sankcionirana u skladu sa pozitivnim zakonskim propisima.

Zbog sve navedenog pozivamo zastupnike Zastupničkog doma Parlamenta BiH da usvoje predložene izmjene Zakona o akcizama u BiH i na taj način na djelu pokažu da rade u interesu građana i privrede, a na pojedinaca i interesnih grupa.

Zastupnički dom Parlamenta BiH izglasao ukidanje akciza na gorivo

Po isteku šest mjeseci, ostavljena je mogućnost Vijeću ministara BiH da svojom odlukom produži za tri mjeseca definisani iznos akcize

Zastupnički dom Parlamentarne skupštine Bosne i Hercegovine na prijedlog zastupnika SDP-a usvojio je Prijedlog zakona o izmjenama zakona o akcizama u BiH, kojim se ukidaju akcize na naftne derivate u trajanju od šest mjeseci.

Ranije je Udruženje poslodavaca FBiH pozvalo zastupnike Zastupničkog doma PBiH da usvoje prijedlog Kluba poslanika SDP BiH i donesu Prijedlog zakona o izmjenama Zakona o akcizama u Bosni i Hercegovini, ističući da bi ukidanje akciza na naftu i naftne derivate u BiH dovelo do smanjenja cijena goriva, čime bi se u značajnoj mjeri pomoglo građanima, ali i privredi da prebrode postojeću krizu. UPFBiH se zalaže da svaka zloupotreba ukidanja akciza na naftne derivate od strane privrednih društava bude sankcionirana u skladu sa pozitivnim zakonskim propisima.

Odlukom su ukinute akcize na dizel-gorivo i ostala plinska ulja, petrolej, motorni benzin-bezokolovni, motorni benzin, lož-ulje, tečni naftni plin za pogon motornih vozila, biogoriva i biotečnosti.

Po isteku šest mjeseci, ostavljena je mogućnost Vijeću ministara BiH da svojom odlukom produži za tri mjeseca definisani iznos akcize.

Ovim zakonom definisani iznos akcize za naftne derivate na snazi je šest mjeseci, nakon čega se iznos akcize vraća kako je definisano Zakonom o akcizama u Bosni i Hercegovini.

Da bi stupio na snagu, potrebno je da ga potvrdi Dom naroda Parlamentarne skupštine BiH, a ukoliko se to desi doći će do pada cijena svih naftnih derivata.

Dom naroda Parlamentarne skupštine BiH nije razmatrao ukidanje akciza na gorivo

Postojala je opća, ali nije entitetska većina da se prijedlog o ukidanju akciza na gorivo razmatra po hitnom postupku



Dom naroda Parlamentarne skupštine Bosne i Hercegovine na današnjoj sjednici nije glasao o izmjenama Zakona o akcizama, kojim je predviđeno privremeno ukidanje akciza na naftne derivate.

Postojala je opća, ali nije entitetska većina da se prijedlog o ukidanju akciza na gorivo razmatra po hitnom postupku. Delegati iz Saveza nezavisnih socijaldemokrata nisu podržali donošenje izmjena Zakona po hitnom postupku.

Zastupnički dom PBiH je prošle sedmice po hitnom postupku usvojio prijedlog ovog zakona, koji predviđa ukidanje akciza na gorivo, što bi dovelo do smanjenja cijene goriva od 30 do 45 feninga po litru.

Ukidanje akciza je predloženo nakon velikog poskupljenja nafte u BiH, što je za posljedicu imalo poskupljenje ostalih potrepština.

Na inicijativu UPFBiH, ZD PFBiH odobrio nastavak rada termoblokova 4 i 5 u Tuzli i Kaknju

UPFBiH je predložilo da se problem Člana 9. u spornim ugovorima o snabdijevanju električnom energijom može riješiti otvaranjem ovih blokova



Zastupnički dom Federalnog parlamenta odobrio je 09. marta 2022. godine na vanrednoj sjednici, na prijedlog Federalne vlade, nastavak rada blokova 4 i 5 u termoelektranama Tuzla i Kakanj dok je na snazi član 16a Zakona o dopuni zakona o električnoj energiji u Federaciji BiH.

Time se osigurava nesmetano snabdijevanje električnom energijom i grijanje gradova koji su na ovim blokovima, navedeno je.

Udruženje poslodavaca FBiH je ranije predložilo da problem Člana 9. u spornim ugovorima o snabdijevanju električnom energijom može riješiti na način da Vlada FBiH hitno predloži, a Parlament FBiH donese odluku o odlaganju zatvaranja blokova termoelektrana Kakanj i Tuzla, koji su trebali biti zatvoreni ove godine.



Predstavnici UPFBiH i UUPRS sa šefom Delegacije EU u BiH

Poslodavci istakli da su nedostatak kvalifikovane radne snage i povećanje plata trenutno najveći problemi

Ambasador Johann Sattler, šef Delegacije EU i specijalni predstavnik EU u BiH sastao se 24. marta s predstavnicima dva udruženja poslodavaca u BiH, odnosno predsjednikom i direktorom Udruženja poslodavaca FBiH Adnanom Smailbegovićem i Mladenom Pandurevićem, te predsjednikom i direktorom Unije udruženja poslodavaca RS Sašom Trivićem i Sašom Ačićem.



Učesnici su tokom sastanka razmijenili stavove o efektima ruske invazije na Ukrajinu u globalnom i domaćem kontekstu, uključujući potencijalne nestašice finalnih proizvoda i sirovina, poremećaje u globalnim lancima snabdijevanja i kretanjima cijena uslijed dugotrajne krize uzrokovane invazijom koja je jučer ušla u svoj drugi mjesec.

Bez obzira na poteškoće u protekle dvije godine pandemije, te ekonomske poremećaje koji su uslijedili zbog ruske invazije, predstavnici oba udruženja ističu da su nedostatak kvalifikovane radne snage i povećanje plata trenutno najveći problemi s kojima se suočava realni sektor.

Potrebno je rješavati ova pitanja kako bi privreda mogla prevazići ove prepreke i očuvati konkurentnost, uz aktivnu podršku vlasti, prvenstveno po pitanju plata.

Učesnici sastanka složili su se da u tako teškim vremenima fokus treba biti na privredi, a ne politici, te da je potrebno intenzivirati reforme u prilog ekonomskoj aktivnosti, uključujući i one vezane uz provođenje zakona. U tom smislu, zaključeno je da su dosadašnji reformski naponi bili nedostatni i da su doveli do malo ili nimalo poboljšanja. Učesnici sastanka dogovorili su nastavak razgovora i saradnje na promociji i zagovaranju reformi koje bi donijele koristi za poduzeća i približile zemlju napretku na putu prema EU. U konačnici, takve reforme će se pretočiti u poboljšanje životnog standarda za sve građane u BiH.

UPFBiH uputilo DN PSBiH amandman na Prijedlog zakona o dopunama zakona o porezu na dodanu vrijednost



Udruženje poslodavaca FBiH uputilo je predsjedavajućem Domu naroda Parlamentarne skupštine BiH Draganu Čoviću i klubovima naroda u DN PSBiH amandman UPFBiH na Prijedlog zakona o dopunama Zakona o porezu na dodanu vrijednost. Isti amandman upućen je i predsjedavajućem Klubu zastupnika SDS-a, Partije demokratskog progresa i Demokratskog narodnog savaza Mirku

Šaroviću, predlagачu Zakona.

Ovaj prijedlog zakona usvojen je po hitnom postupku na 27. sjednici Zastupničkog doma PS BiH, a trebao bi se naći na narednoj sjednici Doma naroda PS BiH.

Udruženje upozorava da ukoliko se Zakon usvoji u istovjetnom tekstu kakav je usvojen na Zastupničkom domu, načinit će se velika šteta domaćim privrednicima, proizvođačima piva, vina i rakije, a neće se postići značajan finansijski efekat za Budžet. Stoga je UPFBiH uputilo amandman sa detaljnim objašnjenjima na razmatranje i usvajanje.

Amandman Udruženja pročitajte [OVDJE](#).

Predstavници UPFBiH sa ministricom Đapo o problemima nedostatka kadrova u turističko – ugostiteljskom sektoru



Predstavnici Udruženja poslodavaca FBiH održali su 15. marta 2022. godine sastanak sa ministricom Federalnog ministarstva okoliša i turizma Editom Đapo i saradnicima, a kako bi predstavili problem nedostatka kadra u turističko – ugostiteljskom sektoru, nemogućnost zapošljavanja studenata, nemogućnost obavljanja privremenih i povremenih poslova iz osnovne djelatnosti rada (turizam i ugostiteljstvo), a za kojima se ukazala potreba uslijed, na primjer, obavljanja sezonskih poslova, vikendom, prilikom održavanja određenih događaja itd.

Đapo je naglasila da je Ministarstvo upoznato s ovim problemom i da već godinama ukazuju da je potrebno iznaći rješenje kako bi se olakšao rad privrednim subjektima u turističko-ugostiteljskom sektoru.

S obzirom na to da je Federalno ministarstvo rada i socijalne politike nadležno za propise iz oblasti rada, a Federalno ministarstvo obrazovanja za studente, na sastanku je zaključeno da će se u narednom periodu u što kraćem roku pronaći rješenje za navedenu problematiku. Federalno ministarstvo okoliša i turizma će s Udruženjem poslodavaca pružiti svu potrebnu pomoć.

Problemi koje će izazvati primjena Zakona o carinskoj politici

Uskoro će u Bosni i Hercegovini početi primjena Zakona o carinskoj politici i Odluke o provođenju zakona o carinskoj politici u BiH. Međutim, početak primjene ova dva pravna akta proizvest će probleme poslodavcima, o čemu su razgovarali predstavnici UPFBiH i kompanija Sisecam soda Lukavac, Solane i Lukavac Cement.

Naime, novim Zakonom se ukida institut pojednostavljenog postupka po fakturi, što će dovesti do velikih problema i kompanijama i državi. Kompanije će početkom primjene novog Zakona i Odluke imati

mogućnost da koriste postupak kućnog carinjenja. Međutim, prelazak velikog broja kompanija koje su



koristile pojednostavljeni postupak po fakturi na postupak kućnog carinjenja usporit će protok robe, carinske ispostave bit će preopterećene, a pitanje je da li carinske ispostave imaju materijalne i ljudske kapacitete za rad.

Svrha pojednostavljenog postupka po fakturi je jednostavnija i brža procedura izvoza, odnosno pojednostavljenje kojim će se podstaknuti izvoz. Njegovim ukidanjem ugrozit će se izvoz, ali i cjelokupni ekonomski razvoj, produžit će se rok isporuke prema kupcima, smanjit će se proizvodnja i poslovne aktivnosti, a povećat će se cijene proizvoda.

Zbog svega navedenog, potrebno je poduzeti aktivnosti kako bi se smanjile negativne posljedice ukidanja pomenutog instituta, te je zaključeno da će se zatražiti sastanak sa predstavnicima Ministarstva vanjske trgovine i ekonomskih odnosa BiH, na kojem će biti pozvani i kompanije i predstavnici Unije Udruženja poslodavaca RS-a. Organizovat će se sastanak i sa Upravom za indirektno oporezivanje kako bi razgovarali o mogućim rješenjima problema koji će se pojaviti početkom primjene novog Zakona o carinskoj politici u BiH.

Predstavnici UPFBiH i Ministarstva vanjske trgovine i ekonomskih odnosa BiH o postupku carinjena



Predstavnici UPFBiH održali su 30. marta 2022. godine sastanak s predstavnicima Ministarstva vanjske trgovine i ekonomskih odnosa BiH, odjel za carinsku politiku.

Predstavnici UPFBiH su iznijeli moguće probleme koji će se pojaviti početkom primjene novog Zakona o carinskoj politici u BiH i Odluke o provođenju zakona o carinskoj politici u BiH. Prema informacijama iz Uprave za indirektno oporezivanje početkom primjene Zakona i Odluke prestaje i mogućnost korištenja pojednostavljenog postupka po fakturi, što će dovesti do velikih problema i kompanijama i državi. Kompanije će imati mogućnost da koriste postupak kućnog carinjenja, međutim, prelazak velikog broja kompanija koje su koristile pojednostavljeni postupak po fakturi na postupak kućnog carinjenja usporit će protok robe, carinske ispostave bit će preopterećene, a pitanje je da li carinske ispostave imaju materijalne i ljudske kapacitete za rad.

Predstavnici Ministarstva su iznijeli jasan stav da početak primjene ova dva akta ne može dovesti u nepovoljniji položaj poslodavce, odnosno ukinuti olakšanja i povlastice koje imaju trenutno. Cilj novog Zakona je olakšavanje poslovanja te nikako ne bi smio dovesti do gubitka prava koja poslodavci trenutno uživaju prema važećem Zakonu. Zaključeno je da će poslodavci u narednom periodu održati sastanak s predstavnicima Uprave za indirektno oporezivanje na kojem će dobiti informacije vezane za pojednostavljene postupke koji su predviđeni novim Zakonom, a nakon toga će se ponovo održati sastanak sa Ministarstvom vanjske trgovine i ekonomskih odnosa BiH kako bi se dogovorili pravci djelovanja.

Predstavnici UPFBiH i UUPRS sa ambasadorom Švicarske u BiH

Predstavnici Udruženja poslodavaca FBiH i Unije udruženja poslodavaca RS održali su radnu večeru sa ambasadorom Švicarske u BiH Danienom Hunnom.

Na sastanku je razgovarano o aktuelnim ekonomskim temama, poslovnom okruženju te problemima i izazovima sa

kojima se susreće privredni sektor u Bosni i Hercegovini. Ambasada Švicarske u BiH podržat će održavanje konferencije na temu poslovnog ambijenta koja će adresirati spomenutu problematiku, zaključeno je na sastanku.



Direktor UPFBiH učestvovao na konferenciji "Prijedlozi zakona o porezu na dohodak i doprinosima u FBiH"

Konferencija pod nazivom "Prijedlozi zakona o porezu na dohodak i doprinosima u Federaciji Bosne i Hercegovine: Veće plaće ili udar na džepove građana?" održana je 25. marta 2022. godine u Sarajevu u organizaciji Liberalnog foruma.

Tokom konferencije, političari, ekonomisti, predstavnici nevladinih organizacija, poduzetnici i freelanceri

analizirali su Prijedlog zakona o porezu na dohodak i Prijedlog zakona o doprinosima te pokušali



dati odgovor na pitanje kakve bi bile posljedice usvajanja zakona u takvom obliku.

Predsjednik Liberalnog foruma Danijal Hadžović podsjetio je da će ta dva zakona biti razmatrana na sjednici Zastupničkog doma Parlamenta FBiH 28. i 29. marta.

Smatra da je prije usvajanja potrebna sveobuhvatna rasprava između različitih privrednih subjekata, radnika, ekonomista i poslodavaca, ali i političkih predstavnika, kako bi se utvrdile prednosti i mane zakona.

Kao prednosti prijedloga zakona naveo je smanjenje doprinosa, što pruža mogućnost rasterećenje poslodavaca i lakšeg zapošljavanja, ali kao negativnu posljedicu izdvojio je insistiranje Vlade FBiH da su ugovori o djelu i ugovori freelancera izjednačeni sa ugovorima o radu, što je, kako je kazao, potpuna besmislica.

- Freelanceri će umjesto dosadašnjih deset posto poreza na dohodak i četiri posto doprinosa za zdravstvo, sada morati plaćati 32,5 posto doprinosa i 13 posto poreza na dohodak, što je brutalno povećanje nameta. Pored toga, zakon im ne nudi pravo da koriste doprinose koje bi morali plaćati u punom obimu - rekao je.



Direktor Udruženja poslodavaca Federacije BiH Mladen Pandurević tvrdi da su Prijedlog zakona o porezu na dohodak i Prijedlog zakona o doprinosima loši, iako imaju neke dobre strane.

- Ti zakoni su sedam godina u proceduri, jer Vlada FBiH ne zna ili nije spremna da napravi zakone na način da budu stvarni reformski zakoni - poručio je.



Pandurević smatra da su poslodavci dovedeni u situaciji da njima odgovara usvajanje tih zakona, jer im uslijed ranijeg opterećenja rada, bilo kakvo olakšanje nešto znači, ali da nisu zadovoljni definisanjem velikog broj odredbi.

Tvrdi da će plaće biti povećane onima čije su plaće veće od 1.500 KM te da postoji realna opasnost da će biti smanjene onima čije su plaće niže od prosječne.

Ekonomista Admir Čavalić smatra da se mnogo kasni s usvajanjem zakona, iako su reformski. To su, pojasnio je, arhaična rješenja koja su pisana prije pet godina te da nije dobro u vremenu inflacije dizati porez na dohodak ili opterećivati ugovore o djelu i poslovanje freelancera, jer su te kategorije bitne za domaću ekonomiju.

Rasterećenjem poslovanja do novih radnih mjesta

Udruženje poslodavaca FBiH i Dnevni list organizirali su 31. marta 2022. godine panel diskusiju na temu "Uloga lokalne zajednice u procesu rasterećenja privrednog sektora".

Panelisti su bili direktor UPFBiH Mladen Pandurević, predsjednik Gradskog vijeća Mostara Salem Marić, predsjednik Upravnog odbora Asocijacije poduzetnika Hercegovine Damir Vidačak, predsjednik Udruge LiNK Tomislav Majić, te pomoćnik ministra u sektoru za obrt u Federalnom ministarstvu razvoja poduzetništva i obrta Izudin Kurtović.

Diskusija je imala za cilj približiti problematike opterećenja privrednog sektora i kreiranja povoljnijih uslova poslovanja u našoj zemlji. Jedan od ciljeva prema riječima Mladena Pandurevića je i pokretanje razgovora oko opterećenja niza parafiskalnih nameta koje plaćaju poslodavci, i to na lokalnom nivou.

Cilj je da se novac iskoristi za nove investicije, da imamo više radnih mjesta i da se poveća životni standard građana. Nažalost, bh. društvo je danas podijeljeno i nužno je raditi na inkluziji kako bi se donosile odluke koje će biti na dobrobit građana, konstatirao je Pandurević.



Pomoćnik ministra u sektoru za obrt Federalnog ministarstva razvoja poduzetništva i obrta Izedin Kurtović predstavio je novi Zakona o obrtu i srodnim djelatnostima u Federaciji BiH.

"U prvom redu riječ je o omogućavanju vanjskotrgovinskog poslovanja. Dosad je to bio limitirajući čimbenik, jer svi obrtnici koji su imali taj vid registracije nisu imali pravo sudjelovati na vanjskotrgovinskom poslovanju. Danas im se otvara nova mogućnost da izravno sudjeluju odnosno daje im se mogućnost da mogu izravno uvoziti repromaterijal i na taj način bi svoju cijenu mogli unaprijediti odnosno postigli bi što bolju prodajnu cijenu", kazao je Kurtović.

Damir Vidačak, predsjednik Upravnog odbora Asocijacije poduzetnika Hercegovine, kao i Tomislav Majić, predsjednik Udruge LiNK naveli su niz konkretnih primjera kako problema s kojima se susreću, tako i mogućih rješenja koja bi umnogome unaprijedila saradnju lokalne politike i privrednog sektora. Od ogromnog broja parafiskalnih nameta, brojnih nelogičnosti po pitanju komunalnih taksi i naknada, do predugog čekanja da se riješi sva potrebna dokumentacija kada poslodavci žele pokrenuti posao, te niza ostalih problema.

Predsjednik Gradskog vijeća Mostara Salem Marić najavio je osnivanje ekonomskog vijeća koje će raditi upravo na rješavanju problema koji su se mogli čuti na diskusiji. Također, prisutni su se osvrnuli i na fiskalne zakone koje je predložila Vlada FBiH, a zajednički zaključak je da nisu dovoljno kvalitetni i da ne rješavaju bit problema, kao i da je vrlo upitan njihov učinak na privredu.

Pisma podrške ukrajinskim udruženjima poslodavaca



Udruženje poslodavaca FBiH uputilo je Savezu poslodavaca Ukrajine i Konfederaciji poslodavaca Ukrajine pisma u kojima se iskazuje solidarnost sa poslodavcima ove države.

"Kao poslodavci koji iza sebe imaju negativno iskustvo ratnih dejstava u svojoj državi i posljedica koje ono ostavlja ponajprije na zdravlje i živote ljudi, ali i na privredne tokove, najiskrenije izražavamo solidarnost i saosjećanje sa vama. Iskreno se nadamo da će razum prevladati i da će vrlo brzo vašom zemljom i cijelim svijetom zavladati mir. Mir koji će omogućiti svima nama koji se bavimo biznisom da neometano radimo, zapošljavamo i stvaramo novu vrijednost za naše države, ali i cijeli svijet. Želimo da u miru i slobodi, poslodavci Ukrajine, Bosne i Hercegovine i cijelog svijeta rade i sarađuju na dobrobit svakog pojedinca i cijele zajednice" navodi se u pismima UPFBiH.

Predsjednik Konfederacije poslodavaca Ukrajine Oleksii Miroshnychenko uputio je dopis UPFBiH u znak zahvalnosti na podršku.

"U ovim izuzetno uznemirujućim vremenima, kada na teritoriju i narod Ukrajine trupe Ruske Federacije izvršavaju invaziju, mi, ukrajinski poslodavci, sa velikom zahvalnošću osjećamo podršku naših bh. prijatelja. Ovih strašnih dvanaest dana opake agresije i neviđene hrabrosti ukrajinskog naroda, podržanog od cijelog svijeta, pokazali su da u svijetu postoji humanost i da su ljudi spremni da se suprotstave teroru, strahu i diktaturi. Cijenimo vašu podršku i nadamo se da ćemo se uskoro sresti u našoj obnovljenoj i prosperitetnoj zemlji". Pismo Konfederacije poslodavaca Ukrajine pročitajte [OVDJE](#).

Održana sjednica ESV-a ZDK



Na sjednici Ekonomsko-socijalnog vijeća ZDK, održanoj 09. marta 2022. godine, razmatran je Prijedlog programa utroška budžetskih sredstava za 2022. godinu, subvencija privatnim poduzećima i poduzetnicima. Konstatovano je da su većinom ugrađene mjere iskazane kao prijedlozi poslodavaca u posljednje dvije godine, a što je omogućilo povećanje stavke sredstava namijenjene za ove svrhe u Budžetu za 2022. godinu.

članovi su raspravljali i o elementima javnih poziva za pristup ovim sredstvima, te su iz Ministarstva privrede pojasnili da su predvidjeli maksimalno pojednostavljenje koje zakon dozvoljava.

Delegacija poslodavaca je predložila da se razmotri mogućnost davanja poticaja kompanijama za izgradnju obnovljivih izvora energije. Predsjednik ESV-a je prihvatio prijedlog naglašavajući da pomenuto nije u resoru privrede te da će pokušati ovu stavku uvrstiti u resor kojem pripada.

U nastavku sjednice razmatran je i Nacrt zakona o turizmu ZDK. Delegacija poslodavaca u ESV-u ZDK podržala je Nacrt koji ne predviđa dodatne namete za poslodavce. Ranije delegacija poslodavaca nije podržala Nacrt zakona o turističkim zajednicama ZDK te je isti povučen zaključkom ESV-a i uz prihvatanje Vlade da sačini Nacrt zakona u obliku o kojem se danas raspravljalo. Nakon diskusije, Ekonomsko-socijalno vijeće ZDK je primilo k znanju nacrt predloženog zakona i odobrilo za dalju proceduru javne rasprave.



UDRUŽENJE POSLODAVACA

**UDRUŽENJE POSLODAVACA FBiH
MARŠALA TITA 6, 71 000 SARAJEVO**

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba